

समे – 12:25

<><><><><><>

J&K Vigilance Week

जम्मू कश्मीर सरकार अज्जै थमां सर्तकता जागरूकता हफता मना करदी ऐ जेहदी शुरुआत अज्ज मुखमंत्रि उमर अब्दुल्ला हुंदे आस्सेआ औपचारिक तौरा पर सगंध चुक्कने कन्नै होई। सिविल सचिवालय श्रीनगर च मीटिंग हाल च लग्गे दे इक कार्यक्रम दरान सब्बने प्रशासनिक सचिवें बी उंदे कन्नै सगंध चुक्की जिसलै जे दौनें डिजीजनल कमीशनर ते सब्बने जिलें दे विकास कमीशनर वर्चुअल ढंगे नै इस मुहीम च शामिल होए। बक्ख-बक्ख मैह्कमे गी अपनी सतह पर सर्तकता जागरूकता हफते तैह्ते अपने कम्में प्रति निष्ठा इमानदारी ते अपने अधिकारें ते कर्तव्ये लेई सर्तक जागरूक रौहने दी सगंध चुक्का करदे न। इस ध्याड़े गी मनाने दा मकसद सरकार, प्रशासन ते समाज गी भ्रष्टाचार मुक्त, साफ सुथरा, पारदर्शी ते जवाबदेह बनाना ऐ।

<><><><><><>

Akhnoor Attack

जम्मू जिले दे अखनूर सेक्टर च किश बेपंछानू आतंकवादिएं इक फौजी गड्डी गी नशाना बनांदे होई केई रौंद गोलियां चलाइयां। आकाशवाणी दे जम्मू संवाददाता नै जानकारी दित्ती ऐ जे सेक्टर दे बट्टल इलाके च सुरक्षा बलें घेरा पाइयै बड्डे पैमाने पर तुपाई अभियान शुरु कीते दा ऐ। खौड़ ब्लाक दे बट्टल इलाके च भारी थेआरें कन्नै लैस आतंकवादिएं दे मजुद होने दी सूह ऐ। जानकारी मूजब आतंकवादिएं ग्रां च लग्गा'रदी फौजी अम्बुलेंस पर गोलियां चलाइयां जेहदे बाद इलाके गी घेरियै तुपाई अभियान चलाया जा'रदा ऐ तां जे आतंकवादिएं गी ठकाने लाया जाई सकै, जेहदे च मन्नेआ जा'रदा ऐ जे बन्ना टप्पियै आए दे होने न।

<><><><><><>

LG-Felicates

उपराज्यपाल मनोज सिन्हा होरें प्रशासन दे अधिकारिएं जम्मू कश्मीर पुलस, सेना वायु सेना, केन्द्रीय पुलस बल, आपात ते सेहत सेवा, श्री अमरनाथ दी श्राईन बोर्ड ते स्वयंसेवकें गी श्री

अमरनाथ दी इस ब'रे आली यात्रा दा हिस्सा बनाने ते उसी सफलतापूर्वक सम्मापन करोआने लेई सम्मानित कीता। इस बारे राजभवन च इक कार्यक्रम आयोजित होआ। उपराज्यपाल होरें ाब्बने दी इस यात्रा गी सुचारू ते बवस्था आले ढंगै सिर करोआने लेई सराहना कीती। उनें आखेआ जे सब्बने दे सांझे जतनें कन्नै एह मुमकिन होई सकेआ। इस ब'रे दी श्री अमरनाथ जी दी गुफा च 5 लक्ख 12 ज्हार 252 श्रद्धालुएं मत्था टेकेआ ते शिवें दे हिमलिंग रूपै दे दर्शन कीते हे।

<><><><><><>

Jammu Smart City

जम्मू स्मार्ट सिटी परियोजनाएं दे हिस्से दे तौरा पर जम्मू शैहरे दी ई-आटो ते ई-रिक्षा चलाने आले पैहल गी 17में अर्बन मोबिलिटी इंडिया अवार्ड समारोह च शेहरी ट्रांसपोर्ट दे क्षेत्र च उत्कृष्टता लेई पुरस्कार हाल होआ ऐ। गुजरात दे गांधी नगर च लोआए गेदे इस समारोह च तम्मू स्मार्ट सिटी प्रोजेक्ट दे मुख् कार्जकारी अधिकारी डॉ. देवांश यादव ते उंदी टीम गी “बेह्तरीन नवाचार माली बवस्था आले” दा सम्मान दित्ता गेआ। इस पैहल तैहत जम्मू च माली तौरा पर कमजोर 800 परोआरें गी इस पैहल कन्नै फायदा पुज्जा ऐ। देवांश यादव होरें दस्सेआ जे ई-ओटो लेई 74 ज्हार ते ई-रिक्षा लेई 58 ज्हार रपे दी सब्सिडी उपलब्ध कराई जा'रदी ऐ।

<><><><><><>

Army-Chai Pe Charcha

भारतीय फौज आस्सेआ राजौरी जिले दे सरसोती इलाके च उत्थूं दे सरकारी हाई स्कूल च इक कामयाब “चाय पे चर्चा” दा सरिस्ता कीता। इस पैहल दा मकसद मकामी ग्रामीण लोकें कन्नै वाकफी ते तालमेल बधाना, महत्वपूर्ण विषयें पर उंदे नै गल्ल करना ते फौज ते आम जनता बश्कार सरबंघें गी होर नेड़मा ते मजबूत बनाना हा। इस दरान जिनें प्रमुख विषयें पर गल्लबात होई, उंदे च ग्रां दिएं जरूरतें ते विकास, समुदायिक विकास, इलाके दा समाजी आर्थिक विकास, मकामी प्रशासन बगैरा शामिल हे। एह्दे इलावा ढांचागत विकास, सेहत सेवाएं, शिखा, मानसिक स्वास्थ्य ते टिहारु समुदायिक विकास सरबंधी कम्में कारवाइएं समस्याएं दे नबेड़े दे बारे च बी चर्चा कीती गई।

<><><><><><>

Army-Medical Petrol

राजौरी ते पुंछ जिले दे सनाड, सिआल सुई ते गखरोरे इलाके च फौज दे डाक्टरें च इनें दूर दरेड़े इलाके च गश्त करियै उत्थें रौहने आले गुज्जर ते बक्करवाल समुदायें दे लोकें गी जरूरी सेहत सेवा उपलब्ध कराइयां। इस दरान लोकें कन्नै गल्लबात कीमी गई, उंदी सेहत बारे पुच्छेआ गेआ, उंदी डाक्टरी जांच कीती गई ते उनेंगी दोआइयां बी उपलब्ध कराइयां गेइयां। एह इलाके की जे मते दूर दरेड़े न, इस करियै लोकें गी सेहत ते इलाज गी लेइयै दिक्कतें दा सामना करना पौंदा ऐ इस करियै फौज नै उंदे तगर पुज्जियै उंदे सेहत दिक्खभाल गी जकीनी बनाने लेई एह गैह पुट्टी।

<><><><><><>

Army-Solar Lights

पुंछ जिले दे पीर टोपा इलाके च रौहने आले लोकें दे जीवन स्तरै गी उबड़ा चुक्कने दे मकसद कन्नै फौज दी राश्ट्रीय राइफलज नै उनेंगी सोलर लालटेनां भेंट कीतियां। इस पैहल दा मकसद इस दूर दरेड़े इलाकें दे लोकें गी न्हरे बाहर जाने च सखाल लेई लालाटेने दी सहूलत देना ऐ तां जे बेले कबेले न्हरे बाहर जाने च उनेंगी दिक्कत पेश नेई आवै ते उंदे जीवन स्तरै गी उबड़ा चुक्केआ जाई सकै। सोलर लालटेनां हासल करियै एह लोक ना छड़े खुश न सगुआं एहदे लेई फौज दा आभार बी प्रगट करा करदे न।

<><><><><><>